

堯峰文鈔

三



堯峯文鈔卷一

門人侯官林佶編

騷一首

反招隱辭并序

子居堯峯二年矣客有勸予出者應之曰僕病未能也因作此辭以見志

山高高兮湖之溟靄青蒼兮無冬春輕雲兮冉冉淺瀨兮粼粼晝
悲吟兮謝豹夕叫嘯兮王孫山中之樹兮有桂紛糾枝兮團蓋華
開兮華落森宵窅兮歲歲美一人兮顏如華遙卜築兮山之阿葍
房兮蘭棟繚之兮薜蘿驂吾駕於層岳兮弭吾節乎溪谷酌乳泉
以礪齒兮屑雲子以果腹歲將晏兮孰與偕鄰媛猗兮友麋鹿歎
鳳皇之在笈兮與騏驎之受輶曾不如山中之聞宋兮又何羨乎
組紱攀桂樹兮幽復幽聊延佇兮襍嬉游吁嗟乎山中兮孰云不
可以久留

賦一首

醜女賦

姑胥之間具區之側爰有醜女為狀甚奇舉世少匹嫫母瘤后庶
幾髣髴廣頤雄顴肥皮癡骨鼻齶口哆蛾濃額突朱脣凝煤素肌
傳黍兩眸昏昏寡黑多白腰細數圍足纖盈尺立則痴僂行則傾
仄含詞將吐歲氣先襲雖極筆舌之形容曾未殫其六七然且不
蠶不繅不組不紉既陋且淫不媒呈身袒修袂曳長巾招搖里閭
倚徙市門行步所及羣然駭焉雞飛拍拍犬吠狺狺顧猶未喻其
醜也而高自擬於妖冶之倫哂先施排夸光狎陽文陵毛嬙偏挑
少艾目許神揚如遠如近若迎若將倪影弄態其醜彌章行路畏
之褰衣不顧嘲誚竝作笑咍交互年逾三十孑然如故欲男不得
訖於遲暮嗚呼噫嘻此豈未笄之子寡居之婦待聘而往守貞而
處者邪於是怛悵陽春初皇中夜或擁衾以長嗟或撫鏡而微訴

既愁淡而貯怨亦羨甚而萌妒語曰美女者惡女之仇良有由也

雜著 五首

理財當審盈絀之甄積貯宜酌通久之規等事題本覆稿後

題本不用此稿

臣等看得科臣汪某疏稱天下各項錢糧一年止得銀一千九百六十萬兩天下兵餉共該銀二千四百萬兩盡一歲所入已缺銀四百萬兩而八旗兵餉王以下各滿官并京官外官俸銀共二百零八萬餘兩其祭祀營繕匪頒賚予征討出師等費不與云云查臣部錢糧入不敷出已於四月二十日具有錢糧不敷兵餉缺額等事一疏將十七年歲入若干撥充兵餉若干支用若干不敷若干逐一開明具題恭呈御覽無容復議又疏稱京通倉廩見在漕米四百萬石十七年起運十六年漕糧三百萬石新舊共七百萬石每年王以下八旗披甲支米一百四十萬石尚餘五百

六十萬石足支十八十九二十一年之用是有五年之蓄請
將應運漕米三年折一年云云查京八倉見在梗粟米一百三十
五萬三千一百五十八石零通三倉見在梗粟米一百二十八萬
石零二處共實在米二百六十三萬三千一百五十八石零此各
倉米數之大凡也十六年分漕糧除湖廣久經留充兵餉外約梗
粟米三百零二萬五千二百三十五石零再除江南省題留三十
萬石江西省改折三十萬四千七百三十一石十七年起運淨諒
米二百四十二萬五百石此各省運數之大凡也新舊共止米五
百零五萬三千六百五十八石除每年王以下并八旗披甲人
役各衙門皂書太監匠役等項共諒支米一百五十八萬二千七
百八十八石尚餘米三百四十七萬八百七十石僅足支十八十
九兩年爾今科臣條議改本為折誠從軍國起見與臣等所題
用意畧同但積儲為天下大命京師根本之地所需漕糧關係甚

重臣部祇因錢糧匱乏已極萬不得已始議改折一百萬石本出一時權宜若定三年折一之例設有水旱灾荒西北要地緩急何恃且各省米不起運必至壅積穀賤傷農亦復可慮又停運一年船隻廢置不修河道淤塞不濬次年必大費收拾今議暫將十八年起運十七年漕糧除臣部請改折一百萬石外應如科臣所請再折一百萬石以濟軍需至疏稱改折漕糧三百萬石每石銀一兩四錢共該銀四百二十萬兩通漕糧船一萬隻每船運丁十二名每名月支米一石該糧一百四十四萬石該折銀二百一萬六千兩每船行糧三十六石該糧三十六萬石該折銀五十萬四千兩又易米折蓆輕賫等銀四十萬兩併省造船挑閘修廠諸費通計改折一年共約得銀八百餘萬兩云云查十七年漕糧止有二百四十餘萬石臣部題定粳米每石折銀一兩四錢粟米每石折銀一兩二錢多寡不等其通漕糧船共止七千六百七十四隻運

丁或十名十一名十二名不等共止八萬四千八百二十九名每年支行糧半年月糧一年本色折色不等本色之中行糧每名月支自四斗五升起至六斗止月糧每名月支自九斗起至一石止共米五十六萬八千四百二十一石折色之中行糧每石折銀自五錢起至一兩止共銀四十一萬二千八百六十餘兩此臣部見行則例也臣等今將行月正耗并易米折蓆輕賚各項款通盤打算改折一年不能如科臣所議之數應俟奉 旨後查照漕規請 敕漕撫酌議應折地方米價併各項款造冊題報可也

請申嚴就近撥餉之制以無悞軍需事題本覆稿康熙七年二月題

臣等看得科臣劉某疏稱黔省需餉四十餘萬兩不過數府錢糧已足乃部撥江南江西地丁又撥兩浙及上元等八縣鹽課併本省襍項銀兩既不就近又太零星云云查各省最近貴州者莫如

湖廣但湖廣錢糧先行儘解雲南則就近省分別無可協惟有江西江南較之別省距貴州差為不遠是以將江西省銀十三萬兩江南省銀十七萬兩解濟先經臣部於正月撥餉時題明在案是不可謂之遠撥也至於原撥襍項銀五千餘兩乃是以本省錢糧充本省之用倘不許撥給本省則此項銀兩當於何處支銷是亦不可謂之零星也其兩浙及上元等項鹽課銀十五萬兩繫黔撫羅繪錦於上年十二月題請撥給見銀臣部欲撥七年分錢糧祇恐起解遲悞遂將六年所存鹽課俱屬撥贖見銀限文到速解隨據報解全完是俱不可謂之遠撥并不可謂之零星也又疏稱嗣後撥餉通計本省需餉若干即將鄰省錢糧盡數撥給如有不足再撥他省云云查雲貴兩廣協餉臣部將湖廣江西江南河南等處附近錢糧派撥福建協餉將江浙附近錢糧派撥四川協餉將山陝附近錢糧派撥此後倘有災荒缺額等項始將各省不拘何

項見銀撥補每年正月逐一開列具題在案又疏稱州縣錢糧一經撥餉例於正月開徵今以一省錢糧盡行撥訖必至催科嚴急協餉原以兩限完解合無以二三限解足便民云云查協餉原限四月內完三分之二八月內全完今又定限四月內完一半九月內全完此三五六七八等月原聽各該督撫陸續徵收報解總以照限解足為期此繫臣部見行事例與科臣條奏約畧相同應仍照例行可也

復讐議 并序

河南巡按御史覆奏部民張潮兒手格殺其族兄生員三春臯當死 詔法司核議而潮兒口供中嘗言其母先為三春所殺於是該司員外郎汪琬以為當下御史再審故議之議曰

復讎之議載於周官禮記春秋見於陳子昂韓愈柳宗元王安石之文者詳矣吾不敢復勦其辭惟以 國家之律明之律曰若祖

隄策馬蹏湖水平湖草齊

王秀才欲從軍滇南詩以促之

君才如仲宣擬賦從軍篇銀鞍將錦韉結束毋遷延六詔由來稱
屬吏洱海蒼山等平地一從豺虎事橫行蠻箐迢迢漢關閉番禺
枸醬若爲求益郡碧雞那可祀至尊按劍臨丹墀詔書三道
爭出師牙帳特開都護府戈船直奪昆明池羨君舊擅封侯相遙
逐征南志彌壯錦衣玉具繡登孤趨揖營門不相讓功名已解笑
儒生意氣何妨侵突將鐵柱南頭初合圍看君倚馬速於飛好從
楸鼻醉磨墨檄取蠻中驃信歸

老將行

漁陽老將老逾健手挽強弓彀長箭脩顙坐白盡如虬雙頷下豐
猶似燕自言少小學從戎躍馬能超六郡雄戰血千行頻汚甲癍
痕是處悉通中誰料數奇終得謫平生意氣俱凋喪小吏翻爲投

筆人人奴卻擅封侯相薊門烽火畫紛紛回憶雲臺舊建勳閑殺
南山射虎手醉歸羞說故將軍

過露筋祠

湖水渺無際古祠臨釣磯蕩芰漸蕭颯楓葉森芳菲一二白髮巫
裴回倚門扉陰廊竄鼯鼠畫壁生伊威豈無估客舟來酹茶漿稀
靈兮秉貞素獨處誰相依羞比青谿姑願效黃陵姬山鬼雖陸梁
敢窺坐上幃我茲訪遺蹟日落煙霏霏輕埃侵綠鬟寒吹卷綃衣
環佩了不聞徒然想音徽

玉鉤斜

月觀淒涼罷歌舞三千豔質埋荒楚寶鈿羅帔半隨身蹋作吳公
臺下土春江如故錦颿非露葉風條積漸稀蕭娘行雨知何處惟
見橫塘蛺蝶飛

游支硎山

思矣

汪姓緣起考

按越國公行狀汪姓其先汪芑氏之後或言魯成公友子食采於汪因氏焉羅鄂州汪王廟考實曰氏族之書皆以汪姓出汪罔氏亦曰汪芑孔子所謂漆姓守封嵎之山者在虞夏商為汪罔氏於周為長狄於春秋時為大人又海外西山經有汪野李善以為汪氏國在在海外然則汪罔其氏而汪野其國也顧所居距中國遼遠而哀公時魯乃有汪錡者死齊難為聖人所褒竊嘗以汪罔之人世皆長大號十倍僬僥氏春秋間蓋嘗一至矣兄弟四人各適一國以死其適魯者曰僑如魯之亞卿以名其子而太史公又志其藏以為異然則所謂汪罔之後者何從而容於魯乎藉令在魯雖傳數世其質尚當與常人異孔子之荅吳客何至近舍本國之汪而遠稱封嵎之長狄大人為證乎羅說甚辨故吾汪當從姬姓

裔為正又按舊譜魯成公庶子生而有文在其手左水右王故名曰汪其後子孫遂氏之竊疑春秋時諸侯命大夫之族於是大夫有以王父字為氏者在魯如展氏臧孫氏孟孫叔孫季孫氏之類是也不聞氏王父名者周人以諱事神逮事王父則諱王父名安敢取以為氏魯君亦不當以此命大夫也至若季公鉏之後為公鉏氏伍員之後為員氏此皆後世不知禮者所為春秋時不當然也故吾汪氏之得姓當從食采為正蓋始則以采地為氏繼則以氏為姓也

文戒示門人

昌明博大盛世之文也煩促破碎衰世之文也顛倒諄謬亂世之文也今幸值右文之時而後生為文往往昧於辭義叛於經旨專以新奇可喜囂然自命作者嗟乎人文與天文地文一也日月星辰天之文也山川草木地之文也假令如日夜出兩月竝見日中

見斗又令山湧川鬪桃冬花李冬實夫豈不震耀耳目超於常見
習聞之外其可喜孰甚焉而經史書之不曰新而曰妖不曰奇而
曰變然則今之作者專主於新奇可喜倘亦曾南豐所謂亂道朱
晦翁所謂文中之妖與文中之賊是也僕竊憂之而一二小子輩
方且詆僕言為老狂故不敢以告他人所願諸同志戒之而已其
有及僕之門而志或不同者僕亦不敢以告也

康熙辛未六月乙丑於樵李寓廬錄林佶謹識

堯峯文鈔卷一終



堯峯文鈔卷二

門人候官林佶編

經解一共四十三首 又圖五首

八卦方位圖說二則

河圖者文王八卦方位圖之所自出也按河圖之位以五生數統五成數是故一六居北所謂天一生水地六成之即坎卦所以北也二七居南所謂地二生火天七成之即離卦所以南也三八居東所謂天三生木地八成之即震卦所以東也四九居西所謂地四生金天九成之即兌卦所以西也然則文王四正卦之方位本法河圖而邵子所謂伏羲之圖則不知所本此先天之學所以見非先儒也朱子既主邵子而他日又有康節說伏羲八卦近於穿鑿附會之疑後之學者可以審所從矣

陽主生陰主殺南主生北主殺乾坎陽卦也而居北殺萬物之至者所以生之也坤離陰卦也而居南生萬物之至者所以死之也

推之而極於盛衰禍福喜怒哀樂其倚伏亦猶此也

卦對圖說二則

坎離固皆正對震巽艮兌亦未嘗無正對也頤小過者震艮之正對中孚大過者巽兌之正對是也六子之中惟坎離能各自成卦震巽艮兌雖有正卦亦必兩相附而後成此坎離所以為乾坤大用也

震木陽木也艮山陽土也山必宜木故震艮相附而成卦巽木陰木也兌澤陰水也水草所鍾為澤故巽兌亦必相附而成卦

上下經系卦說五則

先儒謂乾坤為上經之主坎離用事是矣然亦有辨焉自泰否以前乾為主坎用事者也屯蒙需訟師比六卦皆有坎雖震長男艮少男亦必附坎而後成卦天一生水也自泰否以後坤為主離用事者也同人與大有則離先合乾噬嗑與賁則離又合震艮地二